

Communicaziun a las medias dals 21 d'avust 2026 (**Communicaziun ad hoc tenor l'art. 53 RQ**)

La BCG cun in cler augment dal gudogn en l'emprim semester

La Banca Chantunala Grischuna (BCG) concluda l'emprim semester 2026 cun in gudogn dal concern da 137.2 milliuns francs (+18.2%). Il resultat legraivel conferma il success da ses posiziunament sco banca da credit, d'investiziun e da provediment. Cun in agen chapital da 3.0 milliardas francs demussa la BCG sia ferma resilienza.

La BCG scriva cun 137.2 milliuns francs il meglier resultat semestral da sia istorgia. Il CEO Daniel Fust è fitg cuntent: «Il success operativ demussa l'alta capacita productiva d'ina BCG resilienta e robusta. L'augment positiv dal volumen dals emprasts a clientella privata e clientella da fatschenta exprima la gronda confidenza da quella en la BCG ed accentuescha nossa ferma enragischaziun regionala.»

In augment da tut las cumponentas dal retgav

Il retgav da la fatschenta è creschì per totalmain 28.9 milliuns francs (+11.2%) sin 286.3 milliuns francs. A quest resultat han contribuì tut las cumponentas dal retgav. Il resultat da la fatschenta da tschains è s'augmentà per 14.6 milliuns francs (+9.3%). Las marschas sminuidas pervi da l'ambient da tschains nulla perdurant han pudì vegnir cumpensadas cun success cun l'augment dals emprasts e la buna strategia d'investir l'agen chapital. Ultra da quai ha la BCG pudì schliar en l'emprim semester las rectificaziuns da la valor betg pli necessarias en l'autezza da 3.5 milliuns francs nets. Il resultat da la fatschenta da cumissiuns e da servetschs è s'augmentà per 11.3 milliuns francs (+13.5%), en emprima lingia pervi da l'acquisiziun dal volumen d'investiziun en la sedia principala e pervi dal svilup favuraivel dal martgà. Uschia ha la banca pudì augmentar vinavant la quota da la fatschenta betg liada als tschains che importa uss 40.1%.

L'effizienz e la capacita productiva da la banca persvadan vinavant

En il rom da la nova strategia 2026-2030 investescha la BCG sistematicamain en la transformaziun digitala ed en las persunas spezializadas necessarias e resta uschia al puls dal temp. Era sch'ils custs da fatschenta èn s'augmentads perquai per 3.0%, na creschan els betg pli uschè ferm sco en las periodas precedentas grazia ad in focus intensiv sin l'effizienz. Sch'ins metta ils custs en relaziun cun il retgav, cuntanscha la BCG ina quota da 46.8%. Quai è in resultat legraivel che accentuescha l'alta productivita da la banca.

Dapli emprests a clientella privata e clientella da fatschenta

Il volumen da fatschenta da la BCG munta a 78.9 milliardas francs (+0.1%). La dinamica perduranta en il martgà intern ha manà ad ina creschientscha dals emprests a la clientella da 0.1 milliardas francs, quai surtut en il sector da clientella privata e da las interpresas pitschnas e mesaunas. L'afflussiun netta da novs daners en la fatschenta da clientella ha cuntanschì en la sedia principala 0.7 milliardas francs. Il scul monetar net da totalmain 1.0 milliardas francs è d'attribuir a las retratgas da la clientella instituziunala en las societads affiliadas. Quel vegn dentant per gronda part cumpensà dal svilup positiv dal martgà.

Ina banca segira e stabila

Ina basa da chapital solida è in element impurtant per crescer a moda persistente e responsabla. L'agen chapital da la BCG munta en l'emprim semester 2026 a 3.0 milliardas francs – in cler mussament per la fermezza finanziaria e per la resilienza da la banca. La quota dal chapital essenzial evaluada a basa da la ristga s'augmenta per var 0.2% sin in aut nivel da 20.2% (relaziun CET-1). Questa quota demussa la politica da ristga consequenta e persistente da la BCG ed ademplescha las pretensiuns regulatoricas a moda confortabla.

Prevista positiva per il 2026

Las cifras legraivlas da l'emprim semester 2026 mussan che las clientas ed ils clients da la BCG profiteschon d'ina banca finanziada a moda particularmain solida e persistente. La basa da chapital surproporzionala dat ad ella flexibilitad strategica e creescha avunda segirtads per rinforzar vinavant sia posiziun sco ferma banca en il chantun Grischun. Sin fundament dal success en l'emprim semester meglierescha la BCG sia prognosa e spetga per l'onn da gestiun 2026 da nov in gudogn che surpassa quel da l'onn precedent.

La strategia da partecipaziun da la BCG: rinforzar la posiziun da la BZ Bank

En il rom d'ina examinaziun regulara da la strategia da partecipaziun ha il cussegl da banca da la BCG decidì da posizionar la BZ Bank, sia societad affiliada per 100%, pli fermamain sco specialista renconuschida per soluziuns basadas sin aczias e d'augmentar la creschientscha en quest sector. Sia cumpetenza da retschertga e d'investiziun duai la BZ Bank nizzegiar surtut per selecziunar titels individuals en portfolios da la clientella e per gestionar agens fonds tematics. La BCG surpiglia da nov incumbensas supplementaras per la BZ Bank e creescha sinergias en ils secturs da las finanzas e dal controlling e dal management da ristgas.

Questas mesiras van a pèr cun midadas en il cussegl d'administraziun ed en la direcziun da la BZ Bank: Suenten la demissiun da Stefan Sigron per ils 30 da settember 2026 vegn il cussegl d'administraziun cumpletà cun Michèle Hess, commembra dal cussegl da banca da la BCG (cun resalva da l'examinaziun currenta tras la FINMA). CEO Marc Schurter e Peter Rebsamen, manader dals fonds d'investiziun, furman il coc futur da la direcziun da la BZ Bank e responseschan la realisaziun operativa da la strategia. Thomas Kostkiewicz rinforza la direcziun sco responsabel per la gestiun da las ristgas per il 1. da settember 2026 (cun resalva da l'examinaziun currenta tras la FINMA). Dieter Göldi, enfin ussa directur da las finanzas, banduna la BZ Bank sco planisà dapi ditg per la fin d'avust 2026.

Contact:

Thomas Müller, thom.mueller@gkb.ch, telefon +41 81 256 83 11

Bernhard Kobel, bernhard.kobel@gkb.ch, telefon +41 81 256 88 01

Banca Chantunala Grischuna, chascha postala, 7001 Cuirà | medien@gkb.ch / gkb.ch/medien

Banca Chantunala Grischuna.

La Banca Chantunala Grischuna porscha tut quai ch'i dovra per ina banca universal moderna – per persunas privatas, l'economia ed il maun public. L'interpresa è represchentada en tut las regiuns dal Grischun. Cun passa 1'000 collavuraturas e collavuratur è la BCG ina da las pli grondas patrunas en il chantun. Ultra da sias activitads economicas s'engascha ella cun ses sponsuradis, ses fond da contribuziuns, sia collecziun d'art e sia lavur voluntara.

La BCG dispona da participaziuns da maiortad a la Banca privata Bellerive AG ed a l'Albin Kistler AG. Ultra da quai è ella acziunaria unica da la BZ Bank Aktiengesellschaft. Il scrit da participaziun BCG è quotà a la bursa dapi il 1985.

Termins:

Quint annual 2026: 26 favrer 2027

Radunanza da las participantas e dals participants: 17 d'april 2027